


釋教正謬初破

中

180.4

U458a



244968

釋教正謬初破卷下

第十一章論觀音

今之信從佛教者、禮拜觀音、為最盛、塑作女相、云是妙  
 莊王第三、公主、出家修行、得成正果、此在諸大經典所  
 無、如華嚴楞嚴法華諸經、皆有觀世音菩薩、不言是何  
 朝代、父母何人、華嚴經、韓瑟胝羅居士、頌云、勇猛丈夫  
 觀自在、其非婦人、可知、楞嚴經言、菩薩於過去觀世音  
 佛前、從聞思修、入三摩地、三十二應、十四無畏、四不思  
 議功德、令法界眾生、解脫成就、消災獲福、法華經所言、  
 亦復如是、獨無量壽佛經言、觀音與大勢至菩薩、在此

切皮下

佛嶺祀憂道  
著

五

土修行命終生彼國土所言又異總之作經者臆造名  
字非天上天下真有此觀世音菩薩也妙莊國土當在  
何地迦葉古佛當在何時彼香山一卷有識者知其偽  
造矣書既偽造觀音必非實有既非實有不知誰人來  
救苦難彼釋氏必有解之者曰觀音二字自有深意即  
圓通自在之謂也非必真有其人不過示此妙義而已  
然世間婦女豈非咸以爲真有乎彼亦不思妙義惟求  
福田利益得救三塗八難之苦孰知任爾叩頭禮拜於  
杳冥恍惚之中毫無影響則何爲哉

或問佛經何以造此名字究作何解案梵語耶婆盧吉  
帝此云觀世音梵語阿縛盧枳帝溼伐羅此即觀自在  
觀於十方三界人法俱空故名曰觀從聞思修發妙耳

門上聽諸佛說法下聽衆生悲仰之聲故名觀世音入  
三摩地獲殊勝力應化無方真如常寂故名觀自在凡  
此皆以形容佛法頂上一乘之妙若以觀音爲真有其  
人即非佛經本旨第深通經旨者少故以爲真有而徒  
事土木形體自謂莊嚴功德不知獲罪於上帝者大也  
楞嚴經言觀世音菩薩有三十二應十四無畏四不思  
議妙德從此天下寺廟裝塑許多變相分別許多名字  
大約顯慈悲二字之義示菩薩能救一切苦難耳佛氏  
使人信奉其教此法最巧天下愚夫愚婦聞觀音能救  
苦難爭來禮拜無子者求送子觀音溺水者求魚籃觀  
音百千萬苦有百千萬觀音救之以一觀音具百千萬  
化身觀音也要知此亦從輪迴之說推闡出來彼佛教

本國素信輪迴，後人由此臆造去來今三世復造法化報，三身既明，人生惟有今世後世，而後世正有此一永遠世界，則三世之說何來？既知觀音本無其人，則三身之事安有如此？則所謂觀世音者，實是無中生有，不過喻其圓妙之理，安得又有神力耶？所說諸陀羅尼咒，安見保護眾生，安能成就眾生之願？如十一面神咒心經云：如來讚觀自在菩薩，善男子，汝乃發起大慈悲，開示大神咒，由此方便，救脫一切有情，如此說法，明々勸世間人，祈求信奉而已，不知觀音幻相盡，隨虛空，所謂神力，從何而發？寺院中每書大慈大悲救苦救難觀世音菩薩，即在彼教無非誑語，其實能救苦難者，普天下只有一人，即從天而降，上帝子耶穌也。此事上帝獨命耶

蘇，他人安能爲之？耶穌者救也，生時天使謂約瑟曰：取此爲名，即上帝使之救世之驗也。獨是耶穌救世，惟救人行善，救人既正，救人出世途，而入天路，非若觀音救人，出於王法之外，如刀兵摧折枷鎖脫落是也。任其無厭之求，如求子，得子，求財，得財，是也。耶穌救人，有代人死於十字架之真憑實據，非若觀音救人，變化百出，卒之化爲烏有，一先生也。吾勸世人欲救苦難者，以耶穌爲依歸，望上帝赦罪，胡不勉而行之？

破曰：楞嚴詳說六根互用之旨，觀音之義可開會耳。東坡居士大悲問記云：大悲者，觀世音之變也。觀世音由聞而覺，始於聞而能無所聞，始於所聞而能無所不聞，能無所聞雖無身可也，能無所不聞雖千萬億身可也，而況於手與

目乎、雖然、非無身、無以舉千萬億身之衆、非千萬億無所  
示、無身之至、故散而爲千萬億、身聚而爲八萬四千、母陀  
羅臂、八萬四千、淨蜜目、其道一爾、昔吾嘗觀於此、吾頭髮  
不打勝數、而身毛孔亦不可勝數、牽一髮而頭爲之動、拔  
一毛而身爲之變、雖則髮皆頭、而毛孔皆吾身也、彼皆吾  
頭、而不能爲頭之用、彼皆吾身、而不能具身之智、則物有  
以亂之矣、吾將使世人、左手運斤、而右手執削、目數飛雁  
而耳節鳴鼓、首肯旁人、而足識梯級、雖有智者、有所不暇  
矣、而況千手異執、而千目各視乎、及吾燕坐寂然、心念凝  
默、湛然如大明鏡、人鬼鳥獸雜陳于吾前、色聲香味交遘  
乎吾體、心雖不起、而物無不接、接必有道、即千手之出、千  
目之運、雖未可得見、而理則具矣、彼佛菩薩亦然、雖一身

不成二佛、而一佛能徧河沙諸國、非有他也、觸而不亂、至  
而能應理有必、至而何獨疑于大悲乎、明真可禪師曰、以  
理應目、則象帝之先、我得而徹視也、以理應耳、則八荒之  
外、蚊蚋之音、我得而徹聽也、世人信情而不信理、不亦癡  
乎、邪徒不知觀世音爲何物、漫論朝代父母之事、不勝捧  
腹絕倒也、或曰七佛皆有父母姓氏、諸菩薩豈得無姓氏  
耶、蓋西土失其傳、歟、余曰雲棲云、香山卷中稱觀音是妙  
莊王女、出家成道、而號觀音、此訛也、觀音過去古佛、三十  
二應隨類度生、或現女身、耳不是、纔以女身始修成道也、  
華嚴五十三知識中、善財童子詣南海補陀洛迦山、參觀  
自在菩薩、得大悲行法門、當知爲其所居士也、蓋印度命  
名、或取顏色、或取容貌、或取姓、或取德、賢護經云、王舍大

城有優婆塞名曰賢護爲衆上首上生經云阿逸多從今十二年後命終必得生兜率天阿逸多是印度一種姓也不食肉經云迦波利婆羅門子名彌勒智度論云善守等十六菩薩是居家菩薩也毘陀婆羅居士是王舍城舊人寶積王子菩薩是毗耶離國人星德長者菩薩是瞻波國人道師居士菩薩是舍婆提國人那羅達婆羅門菩薩是彌捺國人其載姓氏國土若此觀世音菩薩往生淨土本緣經云南天竺有一國名摩涅婆吒其國有一梵士名長那居家豐饒有妻名摩那斯羅未有子夫婦是爲遺憾祈禱天神生子其子甫三歲復生一子俱男子也兄名早離弟名速離適遭饑歲財穀耗盡庫藏竭乏長那棄子入檀那羅山不還先是摩那斯羅罹病而死後母養二子憂夫

不還告二子曰從是南方有島海岸孤絕峯有甘菓濱有美艸我與汝共行即乘船到島遂棄二子而去於是二子大憂不知所爲晝夜哭泣兄早離憶念父母遺言謂我須發無上道心成就菩薩大悲行解脫門先度他人然後成佛若爲無父母者現父母像若爲無師長者現師長身若爲貧賤者現富貴身國王大臣長者居士宰官婆羅門四衆八部一切隨類無不現之願我常在此島於十方國能施安樂變作山河大地艸木五穀甘菓等令受用者早出生死願我隨母生處不離父生處如是發一百願以壽終爾時梵士長那者今釋迦如來是也母摩那斯羅者阿彌陀如來是也兄早離者我身是也弟速離者大勢至菩薩是也昔時絕島者今補陀洛山也是父母姓氏確有據矣

此經藏外之經故世人罕知之但憾漢土如觀音菩薩徒  
佚其傳耳此章附會傳奕云佛是黠兒觀音戲技之意也

第十二章論世界

小乘中言世界者云四大洲居中乃須彌山外有如須  
彌山者八環之以海海外復有一山曰大鐵圍山爲一  
國土如是千數名曰小千世界又如是千數名曰中千  
又如是千數名曰大千凡三千大千國土一化佛統之  
名曰索訶世界索訶卽娑婆也佛氏所謂四洲中天竺  
及中國皆在南瞻部洲不知地球自有四洲亞西亞歐  
羅巴亞非利加亞墨利加是也近來中國舟船西行已  
至英吉利花旗諸國於地球形勢稍能明曉惟我泰西  
人於輿國之學辨之甚精四洲境土道里井々纖悉皆

知其各國商人周行天下從未有見須彌山大鐵圍山  
此乃天竺國人特創臆說自矜博異蓋天竺人雖善言  
心性而輿地之學全未考訂亦不過憑空結撰然則須  
彌山既未有將三十三天何處安頓鐵圍山既未有將  
七十二地獄何處坐落不值一喙也或言西人最好遠  
遊仍多未徧此實不然以西人估船自開程而歸故處  
屢次繞於地球一周無有更遠之處矣

佛經云娑婆世界釋迦如來所王之土噫何言之妄也  
上帝創造天地必主宰宇宙不使大權旁落彼非冒竊  
上帝之權乎世界開闢巍然煥然所制日月星辰山川  
草木鳥獸魚蟲一々皆供人用人背上帝而奉如來非  
喪其天良乎夫受天命之謂王衆所往歸之謂王佛雖

大覺亦一自了漢未有天命未爲民所既往安得云此世界爲其所王之土耶天下萬國宜從上帝之命受衣食之源宜如何感謝之蒙好生之德宜如何稱頌之可恨佛教行世已久教世人忘其本根思攘上帝之權而欲篡大寶之位也如保羅所云彼惡人妄自尊崇謂超於几稱上帝世所崇拜者而敵之入上帝殿居上帝位自以爲上帝然屆期主以辭氣滅之使彼淪昏以亡華嚴經論世界以爲無量因緣所成如此則世界從無而生水風空俱不必言矣此理實是鷓突凡物必始於有必有造此物者人以精心觀物之變動動必有本不能生於無也察其本原惟上帝而已是上帝爲天地萬物之本也觀人所造之物物愈巧知人之心思愈靈論

人亦然世間聰明睿智之人縱極其聰睿必有造物主以造之則造物主之睿智當無有限量矣由此觀之必有上帝爲造物主於理最通於心最切觀於天地萬物宜隨處發其讚美上帝之意佛氏不以爲然真可謂顛倒固有之智紊亂自然之理矣至於世界之保護滅在成住空壞四劫之中不明言所依賴者何人實是不經之論細考是諸變遷悉有根本田中五穀必先播種無種而生其誰信之地面一切所生之物雨以潤之風以調之日以暄之於是得成其果而造此風雨與日之上帝其根之最初者也造物之功治物之權保全物命之德俱應歸於上帝舊約之首篇云大初之時上帝創造天地大闢顛上帝曰爾元始肇基乎地創造乎天彼必崩



爾恒存爾年。靡暨保羅曰：家必有肇建之者，惟上帝則萬有均爲所建。又曰：我惟信知天地以上帝命而造。佛氏知世界必有成壞，獨不識造此世界之主。此其大病也。○今之地理家精細百倍於古人，人但觀所作萬國四海全圖，可立知佛說世界諸州山海決無有之。然則彼論世界如何而始，如何而終，亦無實據，可知矣。天地初成之日，爲已往事，然世上未有人見之，爲相傳之語。天地末日，爲未來事，如來乃云已見，詳細言之，可笑。莫甚焉。欲知乾坤始終，盍觀新舊約書。蓋此事非上帝有誰能知之。誰示之。彼得曰：大初之世，上帝有命，天地以成。地由水出，因以堅凝。今之天地上帝存之，至審判惡人敗亡之日，焚之以火。此數語即言世界自始至末，乃

引舊約創世紀。上帝曰：天下諸水宜匯一區，使陸地顯露等語。所云太初之世，未言何時。惟上帝造人，當在六七千年以前。大地空曠，汪洋冥漠，者不知歷幾何時。天地萬物當是漸次而成。凡六晝夜者，亦未定。一晝一夜爲幾何時。有云歷年悠久，有云即今之十二時也。在昔先知聖人於異象中，一時而見數千百年之事。始末初終未嘗分析。彼得所云：今之天地焚之於火者，此即世界有成有壞之證也。上帝特使先知知前，有創造亦知後，有敗壞。將來總有一日，世界壞而萬物歸於無有。此即善人歡欣其望之日，亦即惡人畏懼震恐之日。吾勸世人勿信佛氏荒唐世界之說，而預防世界壞後之此一日也。

破曰經云三千大千世界以無量因緣乃成大地依於水輪風輪空輪空無所依以衆生業感安住世界推此理以洞觀混沌未分之時則渾然如雲霧掩大空也成住壞空之四劫於是乎可見矣四大相和五行相克之理皆是陰陽開闔之所變化也阿那律以天眼見三千界如掌菓長脛得神通親見閻浮樹迦葉登須彌頂而唱偈阿難舍舍利于忉利天其神變非凡慮所測也如須彌山如來菩薩大通羅漢皆由無漏定正慧眼所觀視也得定外道婆羅門仙亦各鬚髯視之說之故印度諸外道雖疑佛智不敢疑須彌然於漏無漏之見不能無差異智度論云外書所說須彌純一金色佛所說爲四寶所成蓋外道爲金色者毋乃七金山光輝煥爛映徹須彌最高頂峯也故不能窮

實際漫作此說耳周髀云北方六万里高山障隔日月以有晝夜王子年拾遺記云崑崙山其高出日月之上山有九層相去万里皆是小定力仙人之言跡流到人間而已矣邪徒不知一須彌界況於蓮華藏界耶清魏源地理總論云問西洋船舶所至止有二洲以西洋說五大洲不協則釋典此外尚有第三第四洲信乎曰此外必有二洲不獨釋典言之也即以西人所製地球觀之兩洲實止居全地之半自中國日本以東更無大國其海跨越赤道南北周八萬餘里且多在溫帶寒暑均平之區尚勝地球北極下冷帶有人之地豈冷帶有人而溫帶反無人乎赤道以南空地亦周七萬餘里其地在南極冷帶者半在溫帶者亦半溫帶以下亦必有國土居民西人遊迹偶至名之

曰墨瓦蠟泥加而不能詳其度數形勢豈既有其地而竟無其人乎然則東勝神州北俱盧洲之地即據地球所餘之空度亦鑿然當有二洲又何疑焉經云由須彌窈光四天下虛空各異其色及日既沒於南洲而中西洲有時空色如紅者須彌西面赤頗底迦寶光映虛空餘暉延及我南洲之所為也又闍浮提虛空常青色者以須彌南面瑠璃寶光映於虛空也世界大相粗可知耳邪徒以須彌為荒唐復何見之隘乎此章剽竊劉鳳玄覽篇之說也

### 第十三章論諸天

天竺諸教無有不用六道輪迴之說者佛教論六道與他教同如來未出世前其國早信此說無大變更彼國至今有其書非佛創為此說六道中第一天道即生於

三十三天之人凡所謂欲界色界無色界中日月星宿天四天王天忉利夜摩兜率大梵諸天名色甚奇忉利即帝釋所居大梵即大梵天王所居自在天即摩醯首羅王所居今天竺婆羅門教俱敬禮此諸天王而佛氏衰矣佛教以其國中所崇虛假之神欺誑中國彼所稱天龍八部阿修羅緊那羅皆其國憑空結撰之名色諸天人徒有名號毫無實際安能顯於世間使人見而信之吾人無論何學俱有實際可考為貴彼作佛經時未經考訂所云諸天帝釋梵王果有無此等人物惟以之為如來高弟來聽說法乃為尊敬如來現今中國非佛教中人即不信諸天帝釋與之論辯則云信者有不信者無獨不當云有則信之無則不信耶至所言天堂

則爲誠有問有何據蓋既知耶穌聖經爲上帝默示之書不必更有他據即可信于聖經之言矣此書言世人之外別有天使乃服事上帝奉帝旨意爲天國中人上帝子耶穌降生天使來事之屢見於福音書中將來世界末日上帝乃命天使令死者復生受報其善者歸於天堂與上帝天使同享永福此天使竝無男女諸相亦無生老病死與佛氏所云諸大天王天子及其眷屬大不相同然則天堂乃無罪無苦之地約書所言鑿々可證非如彼教中荒誕不經之說也以一己之見述天堂甚易但言無徵實於世何益不足信也若天父諄々說之則羣生不敢不信自當一我心志以求其福矣欲知上帝如何論天堂請細讀聖書約翰曰末日既屆天地

一新上帝殿在人間與衆偕居衆將爲其民上帝助之無死亡無憂患無哭泣無疾病此言真實無僞當筆之於書○閱百丈清規知釋教不獨敬佛菩薩而已齋天地護日月祈晴禱雨朔望空庭焚香合諸天三界司事神祇俱爲護法中有四大天王大梵天王韋馱天尊等僧人香花供奉名目愈多愈無實際前所言皆非中國素有惟古天竺一國之人懸擬而出夫水旱祈禱宜歸誠上帝不當求虛無杳渺之中舊約書中耶利米曰異邦人所奉之偶像豈能使天沛以膏澤降以甘霖惟我上帝肇造萬物故我賴之且奉偶像者索諸空虛拜邪神者求諸怪誕不知沛膏澤於下民潤甘霖於庶物者爲肇造萬物之上帝而已豈如佛教之虛無寂滅哉愚

間嘗散步寺院入天王殿見四天像所謂增長廣目多  
聞持國者造立名號莊嚴色相以之驚嚇孩提則可明  
眼人何能怖畏恭敬再入見韋馱執杵而立聞修韋馱  
齋者得福報豈非嚇誘愚民妄生希冀耶又入大雄寶  
殿見兩旁或塑梵天帝釋來聽說法或諸天膜拜圍繞  
恭敬觀之正如山塘畫張花々綠々供人悅目以云尊  
信則吾不知也如猶以爲實試觀所繪龍王案東南西  
北有三頭五頭七頭諸獍惡相非出於人之異想幻造  
乎不能感我以誠不能佐吾以善則何益矣耶利米曰  
億兆之禮義虛偽有人入林以斧伐木以工治之屹立  
若柱不能言不能行籍人肩負彰瘕不加爾勿畏之惟  
上帝至大至能莫之與京億兆之大君盡人當敬孰不

畏之崇拜偶像愚蠢孰甚欲知其妄以木爲證惟真上  
帝永生爲王彼赫斯怒則大地震動彼發厥憤則億兆  
不安常告民曰非造天地之上帝必亡於天地間我真  
上帝以其大能創造天地以其智慧展布穹蒼彼命既  
出霧起地極雲積穹蒼電閃雨下惟彼偶像崇之者愚  
蠢偶像偽物內無生氣悉無靈爽妄人所作天災一至  
與僧偕亡由是觀之則偶像之無益明甚如佛經所言  
夫既曰天王非尊於人者多乎以天王身胡跪如來而  
前直以人駕乎天王上矣諸天等衆無有下落然則惟  
一上帝惟萬民奉事之父上天至尊之王耳釋迦與世  
人皆上帝所造之民理宜遵其訓教向之拜跪彼佛氏  
以上帝之權令於諸天王而歸重如來不肯恭敬真王

此其病根在於人所僞立之教。嘗謂凡人所創之教，理為世說法，悉有謬處。惟去人立之教，歸上帝之教，則無有大小功罪之顛倒矣。吾耶穌教理及規範，無非真實不虛。何以知之？以其非人所立，乃上帝所立之教也。然則天上天下，惟一上帝主之。又安有所謂諸天聖衆哉？破曰：日月星辰，梵釋諸王，各羅列諸天，以示吉凶禍福之識，是所以吾徒信而不疑也。宗廟社稷，山河艸木，各分布諸地，以彰善惡邪正之兆，是所以吾徒祀而不棄也。上從非々想，下至阿鼻，皆依衆生業力，而分其位。如世間有貴賤上下，各分階級。經曰：北斗七星者，日月五行之精也。囊括七星，照臨八方，以司善惡。而分禍福羣星，所朝宗萬靈所俯仰。若人能禮拜供養，長壽福貴。又曰：金剛寶地，非龍

鬼魍魎等，可得妄忤。十二神將，樹神土公，欽奉佛勅，不得妄相侵凌。橫忤擾亂，與儒之祭天地、日月、山川鬼神，無有異也。或問曰：帝釋諸天及三十三天之有無，果如何？余答曰：經以日月星辰為各有一世界。然則恒河沙數星宿，即得無非帝釋諸天王及三十三天之所居耶？唯邪徒玩物天地、日月，輕侮宗廟社稷，惑世誣民法，所不赦也。漢土有許大受聖朝佐闢，我土有向井玄松。乾坤辨說，俱駁西洋天學之非。近時我綠山普門和上著佛國曆象編，備論洋學不足信。為寂確實，邪徒自誇天學。然百人百計，千人千說，臆度暗推，無一定理。是所識者，不取也。此章變化宋儒云釋氏不知陰陽五行之道來。

第十四章論地獄

世人爲惡，自然受諸惡報，不於生前，乃於死後。其理甚  
是佛氏以世俗之見，即於死後造地獄之說，其意警人，  
勿作過惡。如阿鼻無間地獄，又有八冷八熱，無數大小  
地獄，刀山劍樹，血湖火坑，諸大苦惱，爲生前罪業之應。  
所謂閻羅王者，卽琰摩王，亦作閻摩羅社。梵語閻摩，雙  
也。羅社，王也。兄妹二人作地獄主，兄理男事，妹理女事。  
故曰雙王。今天竺國婆羅門教，甚敬此王。案此俱無實  
據，可考。如謂世尊說地獄，不過警人爲惡，然豈可造作  
誑語，以虛聲恫喝也。世間事理，國中律法，俱不宜荒誕  
虛無爲事。豈上帝之律法，乃有是耶。如地藏經云：地獄  
在大鐵圍山過西面第一重海。按地球世界，亦行所至  
已極遼遠，並無此等地獄，亦無有夜叉猛獸如彼所云。

也。或問耶穌教中，亦有地獄否。答曰：有之。但約書不言  
在何所。惟云：惡者入，永刑；善者入，永生。蓋一天堂爲善  
報處所，一地獄爲惡報處所而已。聖教勸導惡人，告以  
上帝不悅，凡不識上帝，不服吾主耶穌基督，福者以火  
熱而譴責之，約書所言罪人死後地獄受苦，其較大  
者，卽因心中悔懼，與生前自責相類。自責之刑，吾心較  
刀鋸鼎鑊之刑，吾身尤重。論耶穌於人，無所不愛，不忍  
見其入于地獄，且無所不知。又實知有地獄之事，萬不  
肯以謊語欺人。請言地獄之苦。耶穌曰：世末天使將出  
於善之中，以別其惡，投之以火爐。在彼有哀哭切齒者，又  
謂在左者曰：爾受詛者，離我，入永火，乃爲魔鬼及其使  
者而備也。又曰：倘爾一手陷爾於罪，則斷之，寧殘缺入

於生勿兩手陷地獄不滅之火在彼蟲不死火不滅世  
人聞此自當戰慄恐懼又何必虛空捏造閻羅及十殿  
諸王名字上帝而外地獄豈有他帝王哉或言上帝分  
派諸神審判罪犯一人不能獨理也此亦謬語彼視上  
帝如世人之貌小才力心思皆為有限孰知上帝聖智  
神力無可限量固不必假手於人耶然釋教以如來駕  
於上帝之上已是第一大謬妄無論其他竊願中國民  
人咸識上帝為創造大地保有羣靈訊斷罪犯之大造  
主斯為息邪崇正之第一要務也案彼說十殿閻羅惟  
閻羅名見佛經其餘皆後人所造用中國姓名梵行高  
德置之不信然已不信而勸他人信之恐此罪非輕也  
破曰佛說冥府戒羣業本發於大慈心中耳唯識論云

地獄衆生依自然業見地獄主與種種苦而起心見此是  
地獄處此是夜時此是晝時我以惡業故見狗見鳥或見  
山壓智度論云如夢中無喜事而喜無瞋事而瞋無怖事  
而怖三界衆生亦復如是無明眠故不應瞋而瞋等故知  
心外雖無別境稱彼迷情妄見起染心外雖無地獄相惡  
業成時妄見受苦既是妄見即感妄境即感妄境則非無  
驗矣世尊嘗舉六窗一猿之譬以示衆生識心之難制趣  
善者甚少趨惡者尤多愛執之念如蛾之撲燈貪欲之心  
若蠅之慕糞五官各縱其慾六塵通競其情泥犁之火無  
有盡期豈得止哉婆沙云瞻部洲下過五百踰繕那乃有  
地獄此地獄有大有小其最重處作五逆十惡者感此道  
身按十王之說其來尚矣唐吳道玄畫地獄變相屠估為



之止市宋歐陽修有十王說由此考之古人必有所據歟  
世有十王經鄙俚拙陋不足取焉鐵城泥犁經閻羅王五  
天使者經十八泥犁經五苦章句經詳說地獄苦折衷之  
可以論十王故事也又按王子年拾遺記云周成王即位  
三年有泥犁之國來朝其人稱自發其國常從雲裏而行  
聞雷霆之聲在下或入潛穴又聞波瀾之聲在上漢孝惠  
帝二年泥離國來朝其人長四尺兩角如齒牙出於唇自  
乳以上有靈毛自蔽居於深穴其壽不可測也學者多以  
是等事概為妄誕不思之過也夫地獄之說天理之常也  
故書云天道福善禍淫易云鬼神害盈福謙左傳云有渝  
此盟明神殛之莊子云為不善乎幽閉之中者鬼得而誅  
之知是冥々之中固有賞善罰惡之事也讀搜神記宜驗  
說也

第十五章論瑜伽

記冥報記等確鑿有據復何疑焉或曰十王名義印度既  
佚其故事只未傳譯之耳近時清乾隆帝問印度章嘉國  
師以定羅漢十六十八之名如十王名義亦當諮問印度  
僧而審定之耳此章附會宋儒云為愚民設天堂地獄之  
說也

瑜伽者天竺國語華言相應也如來說法四十九年或  
顯或密瑜伽是密部總名密印真言觀想手口意三者  
相應故名瑜伽所謂焰口者阿難尊者夜見鬼王口吐  
火焰因是恐懼身隨彼類佛垂方便施以甘露摩伽斛  
食法界遍沾云云謂是以此超度羣魔脫離鬼趣使如  
來果有是術立此金山法事實為可笑去其本意遠矣

彼以救度世人為其本意今乃舍之以救餓鬼豈世間無一罪人反於局外憐憫眾鬼耶世人之苦近在眼前餓鬼之苦相離甚遠舍近求遠此一病也手中憑空結此密印安有感召神鬼之理唵啞吽三字有何靈驗曰說幾句不可解之語那有真實用處又一病也灑水作甘露其味安在擲幾顆粳米有誰果腹咒稱佛菩薩名號亦無有佛菩薩當面作此等事明明哄騙愚民無有至誠祈禱之意慈悲救苦之心徒以假冒說謊之言專圖衣食計耳有識者都不肯信然則何以論及曰可歎愚民甚多自唐以來此道已傳千有餘年尚有信者安得不詳說及之耶又其中有多生父母一語夫既先亡久遠有嗣之嗣上帝賞罰之權世人安能補救人生在

世所能愛能助能訓迪者亦惟生存之人萬不能及於泉下至云鬼王現相而告阿難汝三日後亦隨此類不觀我耶穌聖經中所言乎聖經言有富人之鬼入地獄而呼在天之祖此祖言中隔大川欲涉不能夫生前造孽死後受罪者有之矣餓焰中燒彼且不能得滴水以涼其舌安所得甘露而徧體飽滿乎哉既為餓鬼安能來受施食中國年々耗費此頂錢糧豈非可惜觀舊約當周初時猶太國俗尚異端中其聲綿蠻其音微細者為先知聖人以賽亞所斥瑜伽所宣秘密神咒豈非類是耶

破曰法身說法密教之所雅言顯教之所未談也蓋世尊於百千俱胝阿僧祇劫積集菩提資糧加持陀羅尼真言

文字令頓悟菩薩與此相應高野大師曰法身佛常放光明說法而以罪障故不能見譬如日出盲者不見又曰佛有三密一切諸天人皆不解法身深奧應身淺近所以名秘也我土傳瑜伽法不之其人東寺有五家台岳有三家盛倡其法支那會昌之變大失其傳獨流傳于此方綿亙不絕者抑有天龍所呵護耶和州豐山刻儀軌者凡有一百十餘種其未翻刻者真言有覺禪抄天台有阿婆縛抄共滿一百餘卷皆藏外之秘錄而世之所罕觀也至如其効驗載在方冊不暇縷舉焉邪徒叨弄黃吻謂邪術嗚呼何言之傲慢乎苟有荷法之志者不可務而不聞之也此章牽合世儒云以六經所無更嫌咒術爲虛妄之意也

第十六章論持咒

佛氏一切咒語俱出大乘經典如法華經陀羅尼品藥王勇施二菩薩天王羅刹等俱說陀羅尼以守護說法之人其原文無解不可繙譯教人持誦有何應驗不過哄騙愚民而已此等語與世人聽不能感動世人何能感動鬼神彼所敬之諸佛菩薩設果有之以不可解之咒誦於其前亦何益之有哉即云彼國自有能解吾不知其究作何解當時中國帝王往往令僧持咒以祈晴雨後卒不用知其無用也唐法師不空三藏譯準提大悲二陀羅尼並作科儀以行此咒彼教中又生一新奇之法徒作偽言以惑眼目復于咒語每句下綴佛菩薩像謂當觀想持誦消災護福此是佛教中最卑賤之者非般若之理無慈悲之念有識者未嘗不深惡之可歎

愚民不知真理，將世間偽造之事，十分相信。正如西國  
諺云：真理埋於井底矣。夫明月之珠、夜光之璧，非隨路  
可拾之物，必藏於名山大川。世之欲求真理者，不鈎深  
索隱，何能且暮遇也。人能用心，真理自出。彼結印持咒  
對鏡繞壇者，與真理何涉。只如小兒遊戲，伎倆絕無。靈  
驗信此者，暗中摸索，不辨黑白。故耶穌教未行之地，彼  
法亦興。以其難分真偽也。日光一出，遠近大小，普之幽  
暗無不明了。得聞耶穌之道，則偽造文字，奚值一喙。蓋  
觀於新舊約書，當知無間。惡業斷非持咒可滅。陀羅尼  
縱誦之，九十萬遍，無所用之。譬如臣子得罪，君上以手  
作印，非能免咎。然則護罪，上帝豈手印所能解免乎。消  
災滅罪，皆耶穌之功。信者得之，不信者不得也。彼不空

諸僧持咒，入中國，一入人心，迷惑不解。其罪較受持信  
奉者更大。耶穌曰：陷人於罪，禍哉。斯人此之謂也。此等  
邪術幾類道士之符籙，愚弄人間。未聞真理者，每易惑  
之。蓋心無所主，魔即引之。行於不經之途也。彼得曰：民  
間有偽先知，如爾中將有偽師，私傳異端，以害人。主贖  
之，而彼拒之，自速其事。約翰曰：惑民之魔鬼，以及偽師  
投於火坑，晝夜受苦，永世不熄。以上新約所云，蓋言教  
中必有偽先知，偽師迷惡百姓，不免自己受罪。凡教人  
者，不可作偽，以害人。已不明曉自己一人，入於地獄，若  
以訛傳訛，則將來地獄株連徧滿。上帝安能恕此人之  
罪哉。

破曰：持咒有數種，我土傳其法者，以傳教弘法兩大師為

最巨孽而古來得其驗者神泉苑之祈雨天慶之調伏弘安之颶風尤爲其的證維摩經云咒禁術技盡現行此事饒益諸群生苟有護持正法者咒術不可廢焉凡有冤不能自伸者則質諸神而咒詛焉吉凶之報其應如響是世人所知也唐書云以佛教有護國救人求福解厄今改屬祀部如佛圖澄占鑿聲陸法和役神龍不空祈陰兵一行隱北斗孫敬德臨刑而刀三折梅摯妻失明禱上竺復明以若此至簡法救人危厄之中古今有可紀者不可信乎有華嚴持驗法華持驗觀音持驗淨土持驗等宜潛心而熟讀焉此章附會宋儒云念誦密語而行幻妖之意也

第十七章論宗門

禪宗一門在大乘中自出支派梁普通間達摩從天竺

國來自云西土二十八祖相傳佛性以此興于中國名曰正法眼藏其意憐憫釋徒蔽于名相如來本旨已失以故掃除文字障九年面壁宴坐深山所說之法不過卽心卽佛佛不外來不起一念以觀于空卽可明心見性竊謂其說謬矣彼以性爲本善心爲本智不假他求力歸于正此何說也人心日暗人性已壞但觀己力非得天降神光感動永不得遷善改過彼所云心如明鏡究竟不明不淨或破或暗鑑之面目難真塵之拂拭亦不易夫人之初慧心原如鏡此器一壞世間他匠無能修理惟上帝能力使之刮垢磨光世間釋徒一切枯禪無能斷絕惡業或致壞其才具滅聰明而增愚魯如此心本不明又安得明性自不見將孰從見耶上帝悲憫

下民不能自明其德，自救其身，是故以真理托于耶穌，以感動之職托于聖神。凡信耶穌者，其心始能明悟，受感于聖神者，其性始能遷化。嘗考達磨，弟子神光侍立門外，積雪過膝，求道心切，竟斷一臂于足，是達磨授以楞伽傳，以衣鉢命為二祖。噫！人之身體全而受之于天，可用之以歸榮上帝，若權時忍痛割去一臂，徒長矜心，欲人褒異，此不知何功何德也。菩提本非樹，明鏡亦非臺，本來無一物，何處著塵埃。六祖惠能以此一偈，咸謂高出于神秀大師之上，愚意此亦無本之學也。本無一物，即山河大地一切皆空之意，凡耳目之通靈性者，舉不可憑。如此，則人之知識皆誤，無論生知學知，都無依傍，豈其見聞獨異，畢竟彼立說之病也。上帝造人，賦之五官，

以為靈魂之用，若非聾瞶，安有錯亂聞見之理。上帝置人于世，內之心神與外之萬物相通，如釋氏斷滅相通之理，離世獨立，非上帝本旨。遵帝旨者，宜住于世躬行厥善，方為正理。佛氏大病，在以此世間一切福業視為惡濁，夫豈其然。惟世人不善用之，則福業皆為惡濁之具矣。聖經創世記造天地萬物，每日皆云：上帝視之為善。上帝以為善，佛氏以為惡，逆天之罪大矣。彼徒以外物為惡濁，不肯以己心為惡濁，與耶穌教之道相反。如此用心，永不能治己之病。若知己本有病，即知求助于上帝而免其惡業矣。又彼以剷除七情無所作為無善無惡為說，與一切教門之根本相去甚遠。心若明悟，以上帝為主而敬之事之，以同類為兄弟而愛之，訓之如此。

方是大覺若此心自謂明悟絕于外物其迷惑滋甚我  
所有之七情宜發不宜斂以愛報耶穌代贖之恩以惡  
去魔鬼阻敵之患哀以憐世人之愚懼以恐天父之怒  
為釋徒者七情用之于此方合上帝造人之旨若談道  
說法不本乎此欲去人所固有之情雖聲名籍甚吾不  
知之矣

破曰我佛之骨髓只在心之一字而已矣即心即佛之旨  
何待達摩而議之耶淨土之念佛天台之圓觀真言之三  
密凡一切法莫不皆據之雖然當斯時大小二乘摘句執  
文膠泥有無之際是以達摩一出掃蕩其局見雖梁武不  
能契其旨所以籠絡九流警覺世人也夫心也者湛寂靈  
明圓融包羅萬法含藏十方至靈至妙之物也以其圓融

無礙故外觀百物只此一心內觀一心亦只此一心外觀  
百物謂之放光內觀一心謂之返照能放光又能返照此  
心之所以為靈妙也月能照萬川不能返照以月明不靈  
也心能觀百物又能返觀自心靈故心之觀百物非百其  
心內觀又寧有二吾心為深為淨為聖為凡吾心自知是  
即以心觀之非謂所觀者一心能觀者亦一心也一心能  
觀自物又豈不能內觀一心吾欲自觀其心不即用吾心  
豈將假觀於外物乎邪徒不夢解禪理烏知唯心三昧之  
真面目哉此章牽合宋儒云心之外復有一心而管乎此  
心之說也

第十八章論止觀

天台為釋氏名山陳隋間智顛誅茅于此講誦經典其

始習深禪宗後益厭去立空假中三觀以宣注法華義  
句案三觀本天竺龍樹所造恐世人以經典所言爲實  
故作空觀而又偽造一切光景示人故名假觀乃復恐  
此不識此二者對面勘出兩邊截去故曰中觀此惑之  
甚者也夫既知經典爲假便應棄假從真何爲將錯就  
錯彼一切事理俱從空起仍落於空如何可作證據然  
則空假二義俱非真實既無真實從何處覓出一條中  
路來譬諸人以妖術空中現出金銀宮殿無有基趾台  
宗基趾既未能堅乃復判立八教通具三身四土吾不  
知其教有何靠傍身土作何下落也人若立志修行止  
觀何能助之人若自覺性偏止觀何能直之若知其身  
之獲罪上帝心懷憂懼非真主來救誰能釋之說來說

去所謂泯一切法建一切法究竟一切法者終不能安  
慰吾心何足道哉又其所謂六卽者理卽佛名字卽佛  
觀行相似分證究竟卽佛也過此六步地位卽證無上  
菩提此說覺難通一佛號也時說人身時說此六者  
語言文字時刻變換如理卽佛宜稱之曰理不宜呼之  
曰佛理本最要但其所云法界衆生同稟妙性者誤矣  
上帝最後造人賦以秉彝殊於物類然人卽有是性無  
不與罪根同生於心蔽其真理若云物類亦具此性則  
無爲貴人矣又智者云必假言教生信發解夫拜偶佛  
念佛號謂可明心見性不啻彼教所云蒸砂成飯萬不  
可喫者也如欲發其信解宜哀祈天父賜以聖神感化  
吾心卽耶穌允許門徒謂之保惠師者是也如此則去



罪根而獲真理方能覺體圓滿又彼行法華三昧三昧者正定也人性既亂易邪難正不能藉外行以正內疚區々行坐四儀何以能正吾耶穌早關其妄意謂人不必往名山勝地但當以誠以神敬事上帝罪人悔改自是要理其中必有一番作用非徒觀想而已言乎作用已力甚小惟上帝無所不在助之而成奈何宗台惟恃止觀便成正覺吾不信也

破曰判世尊一代之教相分為五時八教也教理既明非觀行無以復性乃依三諦之理空假中示三止三觀一觀心念念不可得先空次假後中離二邊而觀一心如雲外月月者此乃別教之行相也破一切惑莫盛乎空建一切法莫盛乎假究竟一切性莫大乎中復創六即之義以

推圓成之理蓋三諦者天然之性德也迷茲三諦轉成三惑惑破藉乎三觀觀成證乎三智智成乎三德其功大矣名義集云實相體寂因元靜乃稱止本覺靈照由常明故曰觀妄風俄動假妙奢摩他而止之心珠久昏須毗婆舍那而觀矣故身跌於深山磐石之中心隱於鬼神莫測之地泰山崩而不驚雷霆擊而無怖形如稿木迹若死灰矣而此中之靈熒洞達燦群昏而不迷起惑隨緣遍十方而無碍如一輪之月悉照萬波此所以止觀之為妙也又如六即明性善性惡全體起作修深修惡更無別體又理即佛非於事外指理為佛也義書云修善修惡事造三千性善性惡理造三千六處常即故得六而復即也邪徒解空為浮空之空假為虛假之假中為中間之中即為即時之

卽譬說之甚也。此章則竊宋儒云以心使心如口齟口之意也。

第十九章論涅槃

涅槃者滅度之謂也。涅槃不生、樂不滅。佛氏以此二字爲終身歸宿處。如華嚴經普賢行願品云：爲盡法界虛空界一切衆生開示人天涅槃正路是也。金剛經於涅槃上加無餘二字，則真常湛寂之謂也。夫然後知我耶穌之與如來教正相反。如來以寂滅爲樂，度人至無生之地爲功德。耶穌以生命爲樂，救人至不滅之處爲功德。以耶穌之道言之，身世無無生，若有卽地獄受永刑之地，靈魂乃不滅。得救卽天堂受永福之鄉，人可以知所擇矣。無生則生命已壞，得救惟福音有權。保羅曰：耶穌

使死無權，以福音光燭無壞之生命。又曰：上帝視各人所行而報之。凡恒於爲善，求尊榮無壞者，報以永生。凡不順真理而爲不義者，報以赫怒。凡此皆人身後必有之事也。如來不喜生命，恐有無邊煩惱。不知煩惱有自取之道，亦有解免之方。我耶穌乃生命之原，以生命賜其徒，無有煩惱。生前滅罪，身後享福，此其方也。耶穌所賜之生命，如樹之枝，種於其徒之心，後必發枝果。結嘉實，心中固，有善根，自然能成善果。佛氏之說，人之善惡都泯，其徒無生之情，有死之狀。耶穌之道長，其善消，其惡死者暫生者，永與彼大相懸殊。保羅曰：瞬息間末世角響矣。角一響，死者甦，生者化，皆爲無壞。時可壞者加以不壞，死者加以不死。壞者既加以不壞，死者既加以不

不死則經所言死無權而消滅者應矣此言人死皆當  
復生之事然則死後生命愈為可貴矣至於生前之生  
命上帝造人賦以靈明之具非用之於寂滅之中手足  
勤動之時生其知覺心思默運之際開其慧悟所云覺  
悟正不在無想無作處也盡其心力循乎本念敬上帝  
而愛世人如此方是覺悟後事若滅一切性情又安得  
為完人耶且不獨耶穌之道與涅槃不合即其徒之說  
亦有相為齟齬者如法華會義解阿羅漢第三義云殺  
賊亦殺不賊不賊者涅槃是也蓋在彼法中生滅二際  
俱斷則涅槃亦非了義矣苦海茫茫安得一登彼岸無  
有邊岸譬之大風飄舟舵工安往耶穌有天堂作岸佛  
氏不免沉溺之苦以涅槃之無有邊岸也彼又恐世人

不喜涅槃特開淨土一門誘人極樂世界作偽心勞愈  
形其拙其說之自相矛盾亦勢也無俟深言以闢妄也  
破曰世尊以生死為桎梏故偈云生滅滅已寂滅為樂解  
脫生死纏縛之法在此半偈矣蓋涅槃有五種一者小乘  
初果各受人天報盡得生初禪或生二禪或生三禪是名  
隨分涅槃二者小乘極果阿羅漢善斷六根證七識空智  
得生四禪或生空處是名有餘涅槃三者中乘辟支佛果  
觀十二因緣證滅盡樂得生識處乃至非想非々想處是  
名覺滅涅槃四者大乘初地已上菩薩常居六道出入生  
死不捨衆生隨類受形而教化之清淨願行不退菩提是  
名方便涅槃五者菩薩於無量劫世常在生死海中歷諸  
勤苦修行善本成就萬行得證無上真正道是名究竟

涅槃涅槃之義亦廣矣、邪徒不知生死之所從來、以生爲樂、以死爲苦、沈淪于六趣、寔可憫也、此章剽竊宋儒云虛無寂滅空蕩無歸之說也

第二十章論無常

大般涅槃經佛告純陀云、諸佛境界悉皆無常、諸行性相亦復如是、其餘他經言苦空無常者、不一而足、彼觀天地萬物、一切無常、而以無爲爲宗旨、龍樹菩薩、靈輪廬迦論云、自體性無常、如是體無體、彼又以自性無常而歸於無體、夫萬物悉通於人、有有形之物、耳目口鼻所入者是也、有無形之物、情欲念慮所感者是也、如彼所云、則耳目聞見皆不可信、智慧所能盡是虛妄、以爲無常猶之可也、謂之無體則大謬矣、今試舉一桌子問、

學佛者曰是物也得爲有否、必曰無、問何故無、必曰燒以爲灰、是物無常安得有、答之曰燒以爲灰是也、不得云此非、桌子也、不得云此非、灰也、不得云此非、桌子之灰也、謂爲無常、無常亦有體、凡所有體一旦無常、化爲他體者有之、未嘗化爲無體也、所謂無常者我耶、蘇教中聖經亦嘗言之矣、彼得書云、世人如草、其榮若花、草枯花謝、惟主道永存、保羅書云、蓋變遷者世故、雅各書云、爾命伊何、猶雲霧聚散、倏焉出沒頃刻、此言世間光陰有限、歲月無多、人當愛惜寸陰、豫防身後之事、不可浪費虛度、時刻留心、思所以歸榮於上帝、內以克己、外則愛人、如是而論、世界無常、方爲有用、凡聖經所云、皆有體之無常、非無常即無體也、要之、人生在世、不可以

身所見聞者為虛妄，蓋上帝決非以虛妄之物愚弄世  
 人，世間一切物皆有變更，未變之先既變之後，皆不得  
 謂之無體，人所共見共聞者，即是真實，不為虛妄，如其  
 虛妄，我一人受愚，豈天下人々受愚乎？上文所言，桌子  
 化灰，其中必有烟燭，此桌子有若干本質，則烟燭中若  
 干灰中，若干必相等，如是，可謂變體，不可謂之無體，今  
 西學中，凡物有測量之法，可驗者，形質雖變，輕重畧等  
 也，有形者，不得謂之虛妄，則無形者，亦不得謂之虛妄，  
 世入心中，每一動念，自知一切皆為實有，此念雖恒有，  
 起滅不可云無，此一念現前者，即是也，然則吾之心知  
 即是實證，彼聲色香味，必由耳目口鼻而入，尚隔一聞，  
 不若靈府中物，隨發隨見，故更為可憑，動念不虛，非是

一人天下，人々皆然，更不得謂之虛妄，能見外物，能覺  
 內心，二者俱可證為實有，大般涅槃經以涅槃之無作  
 無證者為常，以一切有為為無常，歸於涅槃寂滅為樂，  
 信如此言，既已寂滅，復何樂？蓋上帝造我賦以各種才  
 情各種智慧，必將有所作為，不當以無為為本，以寂滅  
 為樂，用我之才情智慧，服事上帝，即是本分，即是真樂，  
 以賽亞書云：陰府死亡之輩，不能彰爾榮譽，臨墓入土  
 之人，不能望爾踐言，此猶太國王祈求上帝，賜以多生  
 於世數年，而牲牲獻祭謳歌頌揚於上帝之言也，上帝  
 樂聞其歸榮之所禱，更錫一十五齡，至耶穌弟子臨欲  
 命終，祈登天國，亦將親上帝之榮光，聽上帝之使令，以  
 有為為本，今以永在為真樂，蓋恒久而不變者，惟上帝

也、豈若釋氏之必以涅槃為有常哉、且涅槃二字、亦在  
人心中所結撰而成、彼既以業識流浪、凡事虛妄、自性  
無體、則妙明心亦自無常、而此涅槃又安得無常、從聖  
經之言、此世界之富貴貧賤、天壽生死、無常、後世界之  
天堂地獄、方是有常、然而皆有體也、有為也、非無情無  
體、無為乃常也、蓋無為非我真性、以不能服事上帝、故  
也不能事上帝、即真常之樂、有何樂耶、

破曰、生死事大、無常迅速、一呼一吸、不免刹那生滅之理  
矣、覺知三世一切諸法、常無常等、悟性真空、了惑虛妄、功  
成、妙智能自開覺、造次顛沛、不可離道、謂之觀無常行者  
也、禹思日夜、文王自朝于日中、及不遑暇食、周公坐以  
俟朝、孔子云、朝聞道夕死可也、皆是觀無常也、易云、原始

反終、故知死生之說、禮云、六十年制、七十時制、八十  
月制、九十日修、又曰、君即位而為禘、也、禘、春、秋、傳、云、國、君、  
出疆必載禘、是達於無常迅速之理也、圓覺經云、一切眾  
生於無生中、妄見生滅、是名為輪轉、生死、知歸子曰、世之  
大者莫越生死、一息不來、乃屬後世、一念若錯、便隨輪迴  
何事、忽々未得透過、此大關節、執幻泡之身、締金石交、坐  
石火之暴、營千歲計、出生入死、如尺蠖循環、豈可不自警  
乎、邪徒以有為為本、分以永在為真樂、我佛以無為為本  
分、以寂滅為真樂、其義相反、如圓枘方鑿、邪徒未得領知  
無為體、為何物、扭捏穿鑿、欲壞亂龍樹大士如是體、無體  
之義、可謂聞提謗法之罪魁矣、蓋無為者、離為作之義也、  
若離為作法、必不生不滅也、有為作法、必生滅無常也、金

剛經云一切有爲法如夢幻泡影如露亦如電應作如是  
觀涅槃經云此心本自不生亦復不滅不生故寂不滅故  
照常寂常照名常寂光此常人妙心也生滅既滅寂滅現  
前蓋是無生無滅無去無來前古後今之所不能代謝成  
劫壞劫之所不能推遷真常獨露苦樂雙亡故名曰樂若  
以死爲樂則宜速死以返吾真而不可一朝生矣是斷滅  
枯滅絕滅灰滅之滅也安得濫語佛之寂滅也哉如彼秦  
皇求長生藥漢武慕不老術最所惑有爲法之極也邪徒  
固執有爲之二字以未經眼之事爲虛爲妄是彼膏盲之  
病根也我佛一掃如斯邪見之外道細說無爲法以警覺  
昧者如以金篦抉膜不亦盛乎世人莫爲邪徒巧言所誑  
陷阿鼻之火坑矣此章剽竊宋儒云佛者怕生死故只管

說不已之意也

根 考  
無量壽

釋教正謬初破卷下尾





